


BNA ta sigui su maneho berde organizando nan di cuatro simposio educativo



ORANJESTAD (AAN) – Biblioteca Nacional di Aruba ta hopi activo riba tereno di sostenibilidad y siguiendo cu nan mision di educa e poblacion di Aruba, specialmente e hobennan, a bin ta trahando pa conscientisa e hubentud di Aruba riba sistemanan pa hiba un bida sostenibel. Nan ta haci esaki por medio di simposio cu ta trata e temanan di sostenibilidad.

Astrid Britten, directora di Biblioteca Nacional di Aruba a anuncia nan di IV Green Education Symposium Aruba 2015 cual ta tuma luga den e siman di 7 - 11 september na biblioteca na Playa. E tema di e simposio educativo e aña'ki ta "Healthy Soils, Healthy Living!".

Manera a bin ta tumando luga ultimo añanan BNA ta organiza e IV Green Education Symposium Aruba 2015 den colaboracion cu Departamento di Agricultura, Cria y Pesca Santa Rosa y esaki ta specialmente pa e estudiante- y maestronan

di schoolnan secundario y educacion avansa di Aruba.

E schoolnan cu ta participa na e simposio educativo ta: Colegio Arubano (Oranjestad), La Salle College (Oranjestad), Juliana School (Oranjestad), Mon Plaisier College (Oranjestad), Abraham de Veer School (San Nicolas), Colegio San Agustin (San Nicolas), John Wesley College (San Nicolas) y E.P.I. Riba e dianan 8, 9 y 10 di september lo tin workshopnan educativo pa e studiantenan.

E oradornan invita durante e IV Green Education Symposium Aruba 2015 ta Dr. Ir. Filomeno (Boey) Marchena, Ing. Henry de Cuba, docente/medio ambientalista, Teolinda (Olinda) Rasmijn, Drs. Mirscha Winterdal, Ing. Naviel Lue, Christie Mettes, Ir. Gisbert Boekhoudt y Shahaira Croes.

Tabata na 2012 cu SETAR conhuntamente cu Biblioteca Nacional di Aruba a organiza un Green Educacion Symposium Aruba pa di prome

bes na Aruba como un spin off di e Aruba Green Conference. Oradornan e tempo ey tabata Kaetie Stoss, un graduado di State University of New York College na Brockport cu a papia encunto di Educacion di Medio ambiente na e schoolnan na Merca.

Ing. Elthon Lampe di Elmar a papia encunto di implementacion di e auto electronico na Aruba, Ing. Ab Schelling di Caribbean Branch Office TNO a papia di traha riba un "local Know How" na Aruba y Dr. Frederick Stoss di Universidad di Buffalo na New York a papia encunto di con pa gara ideanan sostenibel na e schoolnan.

E di dos simposio a conta cu oradornan manera Drs. Geert Kooistra di Planosfeer (Hulanda) cu a presenta su charla titula: "Al doende en lerende, geeft Aruba de wereld een lesje transitie". Ing. Freddy Vargas di N.V. Elmar (Aruba) a presenta su charla titula: "Aruba, a world leader in Sustainable Energy". Ing. Danilo Croes di W.E.B. N.V. (Aruba) y Ing. Sandro de Cuba di W.E.B. N.V. (Aruba) a presenta nan charla titula: "Aruba moving towards a more renewable island".

Y aña pasa den Cas di Cultura e studiantenan a haya presentacion di Directora di Departamento di Agricultura, Cria y Pesca, señora Nathalie Maduro, e representantenan di WEB N.V., ing. Elthon Lampe di N.V. Elmar, ir. Patty Portier di IBIZA, ing. Johannes Lankester di Hulanda i sr. Taino Heinze di AquaMares.